

COMUNICATO n. 2220 del 17/08/2021

Traduzione in mòcheno

Zommleing zbischn Trentino Digitale ont der Consorzio van Trentiner Gamao'n ver de digitalisierung ont de vernaierung van òrbetomtn

**Der Consorzio van Trentiner Gamao'n ont Trentino Digitale de hom unterschrim as
de 11 van agest**

**a storische Verstea' ver de digitalisierung ont de vernaierung van ingern Òllgamao'
òrbetomtn.**

**De doin zboa de barn zommòrbetn ver de digitalisierung, de vernaierung ont de bècksl
van Gamao'n ont ver za verpersern de naia dinstn ver en guat van lait ont van òrbeter.**

**Der Consorzio van Gamao'n der bart hom za zommòrbetn pet de ingern òrbetomtn,
enveze Trentino Digitale de bart hom za tea' ver za regiarn de IT dinstn ont de 166
localn òrbetomtn. De barn vill sai' de sochen za mòchen: schaug abia za meing zoln de
aktn ont de zertifikationen, abia za òrbetn pet de digitalisierung.**

**Ver dos hòt vill gamòcht de Autonome Provinz va Trea't, am mearestn, der
Verperserungbirtschòft, Untersuacht ont Òrbet Assesorat. De zboa Gesellschòftn de
tea' schoa va hait vort zommòrbeten pet de Provinz, ver za u'vongen an òrbet ver de
Vernaierung, ver za mòchen ont long kennen en òlla de Gamao'n en glaiche vurm as en
gònze provinzal lònt, de naia digitaldinstn as de lait de mechen prauchen, pet SPID,
zomm pet de APP IO ont mit der sistem sa zoln PA.**

En Oa'negea' as ist hait unterschrim kemmen, men sicht a zboate bichtege naieket, s ist kemmen gamòcht
an ausònder plòtz "Azioni Enti Locali" en Trentino Digitale, gònz gamòcht ver de Gamao'n as, no as sèll as
sok der kontratt, der bart hom zboa sitzn en Trea't: oa'na bou as ist Trentino Digitale ont oa'na bou as ist der
Consorzio van Gamao'n.

Der nai plòtz bart sai' der ourt bou organiziern ont mòchen òlla de òrbetn no en de stros va de teknologische
vernaierung ont digitaltransision va de Trentiner Gamao'n.

De struktur bart se tea' sèll as araus kimm van Regiarkomitat, de bart en helven en de Gamao'n iber de
argumentn va de digitalisierung, vernaierung ont bècksl ver sa trong envire sèll as men hòt en sinn ont as
menn miast tea' va de Agenda Digitale, ont nou ver sa trong envire sèll as sok der viarer van draijorplan ver
de informatik en de Òllgamao' òrbetomtn 2020 – 2022.

S stuck iber de Gamao'n bart klòffen van platz en de beiln as men òrbetn bart, ont van u'gahengetn dinstn za
unterstizn der bècksl van aigenen lokal entn.

De òrbetring va de zommòrbet sai' unterstrichen van Provinzalasesor en Birtschòftverperser, as sok as
Trentino Digitale ont der Consorzio van Gamao'n barn òrbetn no en schaug, en zòmmklaum ont en
zòmmleing sèll as de Gamao'n bòrtn se ont as de noat hom, abia digitaldinstn, ont ver za hèlven en de sai'
digitalisierung ont van lònt.

De zòmmòrbet bart trong en reklam va projektn ont naia dinstn zòmm gamòcht, oa'ne pet de Autonome Provinz va Trea't; ont nou en bèrt gem en de kompetenzn ont en de òrbet van Consorzio van Gamoa'n ont va Trentino Digitale, iberhaupt en de zòmmòrbetn va verpesser va de zòmmòrbet pet de amministrazionien ont de Tolgamoa'schòftn.

Kan Consorzio van Gamoa'n bart u'stellt kemmen an "Informativtirl", as bart sai' an punkt ver u'song ont vroggn iber en de digitalisierung ont de naiòrbetn avn lònt.

De zboa bèrkn barn miasn vinnen ont arozoachen de u'hengendinstn as gem sai', ont de qualitet ont de neat van gamoa'platz, ober de barn iberhaupt miasn òrbetn ver za tea' ont regiarn de digitaldinstn ont ver de u'learn van u'stelltn van Gamoa'n.

Trentino Digitale ont der Consorzio van Gamoa'n barn versichern en lònt uniformitet van strategi, pet de helf en de Gamoa'n za tschernen de regiar ont de teknologi ver za mòchen sa oa'ne sai' en de provinzal ont nazional naiketn, petn rif van digitalbècksl va de Autonome Provinz va Trea't.

De zboa bèrkn tea' schoa' hait zòmmòrbetn zòmm pet de Provinz, ver za trong envire a stòtnaiket ver de digitaltransision, ver za tea' ont reklam mòchen, en òlla de Gamoa'n, van a zeichen naia digitaldinstn, en an glaichen vurm avn gònze provinzallònt, ver en guat van lait.

Ibersetz gamòcht van Sprochtirl va de Tolgamoa'schòft Hoa Valzegu' ont Bersntol
(Traduzione a cura dello Sportello linguistico della Comunità Alta Valsugana e Bersntol)

(cdt)